

懷寧縣志卷之五

知懷寧縣事 齊東王毓芳 纂輯  
署 上海趙梅

山川 名勝 冢墓

昔禹貢導山川必循其山之所經水之所歷曰  
至曰過曰會而其中枝分派別透迤曲折之數  
畢詳焉蓋山與水相為經緯各有脉絡山常以  
一山為衆山之總水常以一水為衆水之歸從  
其經緯脉絡疏而析之雖兩戒三條可以指掌  
明也後世郡國之志山川有所必詳然或錯舉  
無次宜陟嶠者時迷於登降觀瀾者或誤於溯  
洄矣懷邑山水大者可數故特從禹貢之例畧

懷寧縣志

卷之五

山川

一

為尋討至於亭臺樓榭攬勝一隅名賢之所偶  
留千載傳其遺韻而臯陶之琴檣里之冢亦注  
水經者所必收也故志山川附以名勝兼及於  
冢墓焉

懷邑山有二支郡治之山起於獨秀石牌而上之山來  
自香茗其中界以皖水

獨秀山在郡治西六十里自天柱至此平岡蜿蜒一峯  
拔地西望之如卓筆北望之如覆釜為懷衆山之祖無  
所倚附故稱獨秀其支麓自北而東別成一峯曰觀音  
洞與黃土山對峙如雙闕然洞在山底有水冬不涸夏  
不溢日兩潮應時子午未知其為江脉海脉也

由獨秀山不及一里而南曰橫山由橫山一里而南曰桑山山體石聳立中有巖洞如層樓可容千人桑山又分二支東降而平曰分龍嶺由分龍嶺而東曰鬍鬚尖又東曰斛嶺又東曰石鏡山石大如房光明若鏡樵夫牧豎歷年椎鑿剝蝕過半偶卽一拳完者拂拭則背睇大龍儼在鏡中石鏡涵空懷景之一也

明阮自華石鏡山詩 天闕玻璃地仙城碧玉樓半峯懸古月尺影辨神州拂幔朝雲蔚承臺綠萼浮妝成羸女去雙鳳過山頭

國朝倪适石鏡山詩 絕壑掛明鏡巉巖聳露臺誰將天上月移向此間來倒影千峯入清光萬古開時

懷寧縣志

卷之五

山川

二

驚雷雨洗不敢長莓苔

又東北曰豹子嶺其壤黃紫相間如豹斑曰木麻嶺一名牧馬嶺曰犁頭尖巉削如犁鏵曰烏兔嶺爲桐懷孔道又東北曰白麟尖體澤而妍態濃意遠與獨秀相埒又東北曰大龍山郡城之屏障也陽隸懷陰隸桐其東出者曰小龍兩山迤邐翩然瞰江每朝霞始升蒼翠欲滴峯巒隱見咫尺異觀餐其容華使人心醉龍山曉黛懷景之一也其南多洞洞可居其北多壑壑可屋可田有村多杏花盛開時紅映十餘里杏村春色亦懷景之一也其東爲黃楊冲多楊爲蘆塘有窟如塘多蘆其峯之最高者曰三鄉尖斗絕如屏三鄉尖之旁爲地維峯

高倚石屏之半以與天柱遙對故曰地維懸崖上有石  
刻曰君恩山重曰忘歸皆擘窠大字筆畫端勁明司李  
黃熙纘所書也地維峯之下爲眞乙觀有上下二觀二  
觀之間有龍王廟祀天井順濟龍王歲旱雩禱輒應康  
熙辛亥太守姚公琅構亭其上曰雨蒼後圯道光甲申  
巡撫陶澍更建易名曰孚澤地維峯之右石壁嶙峋湧  
泉奔注一窟盛之是爲龍湫飛流下注灌田可數百頃  
由龍湫右行巨石夾道曰青牛白馬登陟者必取道其  
間其山腹摺疊成澗則清溪也危橋絕壑石瀨潺湲康  
熙朝郡守劉公樓曾建有清溪亭今圯

明王守仁遊龍山詩

探奇凌碧嶠訪隱入丹邱樹

懷寧縣志

卷之五

山川

三

老能人語麋馴伴客遊雲巖遺鳥篆石洞秘靈湫吾

欲鞭龍起爲霖徧九州

徐鰲龍井詩 靈湫修秩祀北出集賢關龍試初春

雨鶯啼欲曉山詩成雲樹裏人在翠微間民瘼縈心

切聊乘半日閒

郡守張文錦大龍山詩 大龍山色碧嶙峋春日登

臨祀事新異物蜿蜒元有窟靈湫瑞應豈無神茗分

曲澗成三獻樂奏空林徹九鈞雄奠南舒稱巨鎮願

祈豐歲福吾民

胡纘宗登大龍山湫次韻 半山細路入嶙峋沃野

春融百卉新一日陰晴客未卜四時風雨誰爲神雲

楚人也曰龍而長  
大正曰蛇  
頭音如  
注前音  
爲如實  
物浮行  
湫物如  
又懸曰  
音也陶  
卜言造  
瀑水化  
龍爲人  
亦猶陶  
之造瓦

中雞犬空人世鳥外松篁徹帝鈞谷口桃花春水漲  
更攜社酒醉吾民

錢萬選江頭望龍山詩 皖江北望倚天青小龍大

龍開障屏有泉似覺噴滄海不雨常聞掣紫霆文苑

餘光呈地主芳亭麗藻賁山靈何時寄跡留雲卧吏

隱他年乞勒銘

自注郡有書院以龍山題其坊山有井以龍井扁其名望之有感故云

國朝巡撫朱珪龍山詩 龍山何連蜷我行出其肘

雨過山嵐淨鳴泉下深湫清風盪雲陰夕陽射高柳

秧水綠盈疇麥隴青於韭黃花好色香濃豔鵝兒酒

田家勤作苦樂事亦時有歲熟宜霖陽時康息刁斗

所期引養恬王道如龍首

### 懷寧縣志

### 卷之五

山川

四

又過龍山詩 大龍蜿蜒鱗鬣麤中抱萬斛驪淵珠

九冬不乾夏不溢膏澤六皖秔稻秣大江東注環郭

郭倒吸入腹昂其顛潛霍天柱遠拱揖白麟豹嶺挾

走趨輿行山腰度龍腋萬松助吼真笙竽遙看擊尾

忽一掉樅陽噴欲長楓呿過峽燈火照石路澄潭練

淨光可摹行人夢覺天未曙明月恰向浮山舒

邑人汪之順過杏花村看杏花詩 不負花時約猶

嫌已半殘明霞收欲暮初旭好誰看重疊深村巷支

離老社壇落英紛滿地風雨昨宵寒

邑人韓寵杏花村看杏花詩 一年一度杏花風每

度花開半月紅六十年間一千日幾多日屬看花翁

歲歲花時入翠微花前不醉不言歸舊遊難怪多  
零落老樹年來亦漸稀

邑人黃浩浩杏花村詩 村西踏徧又村東一帶人  
家畫未工蘿徑枳籬無近遠春來都在煖香中

由大龍山而南曰南山有洞曰燕子洞土人每於此祈  
子取元鳥至祀高禱之義故名

又南曰集賢嶺有關足資防禦乾隆丙申邑令倪廷  
重修有記言設險守國古之制也保障斯民守土者之  
職也皖上通黔蜀下達淮海爲河朔江左之樞要而集  
賢關離治十七里連山迤邐而來至此爲峽建關其上  
與北峽相似足以扼喉吭而資扞衛云關下有鶴塚邑

懷寧縣志

卷之五

山川

五

人鄧石如曾放鶴於集賢庵後鶴死瘞之望江令滇南  
師範爲之銘焉

元余闕自集賢嶺入大龍山詩 皖公揭楚甸茲嶺  
孕奇形翠積縱江上崇冠呂蒙城戒途入中林平岡  
駐我旌延望失來術周覽多所經峩峩石窻矗窻窻  
巖岫冥疎疎雲朝霽燦燦星辰明彎弓射鳴雁羣谷  
振弦聲仰憐山人居俯閱洞下耕蒼龍起春候金虎  
收光晶權家旣匪學農用或可明願言同載者易爾  
鑄阿兵

師範瘞鶴銘 鶴壽已踰三百歲完白山人紀之甚  
詳化於嘉慶乙丑之四月山人塋之集賢關之側且

向余索銘謂欲手書立石以繼華陽真逸之後乃予銘未就而山人已於十月厭世丙寅初夏蘅衫程子趣予終其事傳鶴卽所以傳人也遂爲之銘曰龍山蒼蒼鳳水瀾瀾爰有仙禽藏骨於此風月千秋雲霄萬里跡去神留比德君子固宜與智永之筆劉蛻之文同一不毀以視夫乘軒者之矜榮炫寵而自鑿其天也於戲高矣

又南曰和尚山以楊和尚得名楊和尚不知何許人嘗歲旱爲鄉民禱雨立應後因禱雨於山上積薪謂人曰無雨焚我日中無雨楊忽吐三昧火自焚時成化三年六月六日也至今鄉人雩禱必祭香火甚盛山下有楊

懷寧縣志

卷之五

山川

六

公洞其藏骨處也集賢關旁甘露庵有遺像在焉

自和尚山而東皆平岡逶迤達於郡治

其支復生支者由鬚鬚尖而北曰竹西嶺其上產磁石又北曰黃土山山之西有觀音巖巖石像如觀音居民因爲閣以祀之前對觀音洞其中爲井田坂又北曰泉水山其上產爐甘石山頂有井泉故名

由斛嶺而南曰張家山東迤曰黃梅山山有天池吐霧則雨山下有壑曰劉家宕居其中者如釜底然又南曰長安嶺爲潛懷孔道上有茶亭明陳奕南建施茶解渴至今子孫尚遵循之有庵額曰鷲嶺天開邑紳任塾八

分書

王荆公渡長安嶺至皖口詩 晨霜踐河梁落日憩  
亭臯念彼千里行惻惻我心勞攬轡上層岡下臨百  
仞濠寒流咽欲竭魚鼈久矣逃暮行苦迢迢細路隱  
蓬蒿驚麇出馬首獸駭忘其曹投僧避夜雨古檠昏  
無膏山風鳴四壁疑身在波濤平明長安嶺雪飛忽  
滿袍天低浮雲深更覺所向高

由長安嶺而東曰百子山三峰矗立秀出雲表百子晴  
嵐亦懷景之一也明季阮大鍼自號百子山樵辱此山  
矣大鍼實桐城人今禮部題名碑及府學前進士坊可  
考也百子山之別峰曰鳳凰曰紗帽兩山逼就曰獅子  
口獅子口才可通車其外爲石門湖由口入則豁舒洞

懷寧縣志

卷之五

山川

七

開重巒疊壑居民數十家種桃萬樹春水生時檣棹者  
輒作武陵想矣

由長安嶺而南曰雪山洞莫測深廣上有泉竇滴露成  
鍾乳倚洞結藍香火之盛及於外郡又南曰龍見嶺有  
龍泉又南曰東山與黃山對峙其內曰冶湖環湖皆山  
冶峰青靄亦懷景之一也

由石鏡山而北曰韭菜山山產石燒灰極良中粉堊用  
曰大安山山麓有廟曰白馬相公廟祀漢舒州從事陳  
衆

由大安山而北曰寨基山疑爲前代營寨之處故名其  
西北曰關口嶺蓋營寨者於此防禦又西曰寶靈山

由豹子嶺而東曰西馬鞍山與自犁頭尖來之東馬鞍山相對峙自南望之如誥軸東馬鞍山有仙人洞甚幽邃未知仙人誰也

由木麻嶺而北曰火爐尖西曰高岡嶺踞高岡之背者曰磨山頂有龍湫禱雨輒驗石壁倒覆有宋淳熙間遊者題名其山產石中礬材舊礬坑遺跡尚在今徙於相思嶺曰小磨山流俗言懷人安土重遷行百里作數日別輒戀戀不能舍多由感此嶺氣所致其語雖不經可以供詩人竹枝吟諷也嶺下人多以治磨爲業小磨山鑿坑至數十丈山爲之空臨其下者股栗而斧斤聲方丁丁相應由高岡嶺而西曰膠山西南曰虎尾山其民

懷寧縣志

卷之五

山川

八

亦多攻石有司宜稍加厲禁無犯蒙恬之戒斯可矣  
由白麟尖而北曰羅家嶺又北曰老林山其下爲源潭鋪東盡於桐城之姥山

由大龍山西迤而南曰甑山在石門湖之中孤峰突立有庵爲劉若宜出世之所南迤曰門山兩山相夾如門  
邑人黎雨稼門山道中詩 活活溪流柳線飄春光  
一逕遠相招微風清唳傳蕭寺細雨疲驢過板橋吟  
苦儘敎衣半濕花開正喜雪全消幾年辜負看山眼  
回首萍踪萬里遙

邑人吳應鉉雨後登門山佛閣詩 綿綿梅雨壓禪  
關綠壑丹崖雲霧間倦起一憑香閣望樹頭無限米

家山

由和尚山而南曰且記嶺相傳金地藏至此將建道場  
曰且記後乃闡化於青陽之九華也又南曰銅鑼山與  
獅子口對峙其內爲石門湖

由郡治而東皆平原曠衍外江裏湖逶迤五十里始有  
山曰柘澗山鬱鬱葱葱如海上別島懷境盡於山之盡  
焉

治西三里曰廣照山又西二里曰霧霽山皆不甚高而  
邱壑殊勝明阮自華號霧霽山人以此郭外有萬松山  
宋馮京讀書處今太平寺白雲庵錢氏陟園皆萬松山  
也城中一指巖俗目爲盛唐山謂漢武帝元封五年南

懷寧縣志

卷之五

山川

九

巡守自潯陽浮江射蛟江中獲之舳艫千里薄樅陽而  
出作盛唐樅陽之歌卽此盛唐按方輿紀要唐開元二  
十七年改霍山縣爲盛唐縣治六安今六安州西三十  
里有武陟山以漢武南巡登陟於此得名宋白曰盛唐  
縣西十五里有盛唐山當卽此山若一指巖但據高阜  
似未足當山名宋景定初遷懷寧城於盛唐灣宜城渡  
之陰或因灣而冒出也

王士禎皖江懷古詩 憶昨經過射蛟浦今朝還望  
盛唐山大江日夜流如昔武帝雄風去不還天馬蒲  
梢空塞外蜚廉桂館自人間茂陵抔土秋風裏玉女  
何曾解駐顏

自鬍鬚尖至此皆桑山東出之支也  
其南出者曰塔嶺曰黑山曰金紫山其下有洞又南曰  
子貢嶺嶺之命名未詳俗傳謂端木氏適楚道經此則  
懷非魯衛適楚之衢且是嶺險峻不通車騎端木卽從  
吳越沂江而上何爲舍正路弗由而由此乎無稽之言  
殆不足與辨也

又南曰花山脊高而平腹盤而鬱與黃梅山相似有寨  
址土人言元李公世珍奉命來援安慶至則安慶已破  
因結寨於此爲元守也又南曰龍池尖雙峰指豎中有  
深池源泉澄澈林木陰森望之疑若仙都矣

又西南曰庫嶺羣山輻輳如貨聚故名又西南曰空度

懷寧縣志

卷之五

山川

十

嶺其上有仙人台石壁方二三丈四圍小石如髻嶺頭  
有蘆一叢每歲必出數十莖經冬不枯花時蕭蕭如洲  
渚云是仙人植杖所生相傳有真仙於此度世無可度  
者故曰空度也又西南曰大雄山山體巉絕磅礴登其  
頂則衆山皆兒孫羅列望皖水若帶焉  
其支復生支者由塔嶺而東曰董家尖又東曰釣魚石  
山脊有奇石倚立磬折若老翁垂釣然  
由花山而北曰梁家山迤而西曰對峽嶺三阜連綴如  
品字西迤而北曰黃栗山如惠文冠  
由花山而西曰旨泉冲又西曰峽石嶺皆高數里重巒  
複沓卽有警皆可防禦方輿紀要引明一統志以此破

石卽桐城之硤石非也淮南有兩硤石在壽州淮水上者曰北硤石在桐城者曰南硤石漢建安十九年孫權攻皖張遼自合肥救至硤石聞城已破築壘硤石南而還謂之南硤戍卽今桐之北硤關是也從合肥言故稱南矣魏太和二年遣曹休侵吳向皖滿寵上言休所從道背江傍湖易進難退吳遣陸遜朱桓等拒之桓曰休非智勇名將戰必敗敗必走走當繇硤石挂車此兩道皆險隘若以萬兵柴路則彼衆可盡而休可擒也遜不從及戰於石亭休果敗追至硤石斬獲無算會賈逵援休吳兵斷硤石者退走逵據硤石以兵糧給休休軍乃振今石亭未能確指其處據滿寵言背江傍湖當在桐

之團亭白石間矣括地志團亭湖水發源南硤石山與白石湖相連湖中有兩小山亭亭高峻白石皎然故有團亭白石之號湖距硤石不遠故休敗卽走硤石也朱桓以挂車並言卽桐之挂車嶺則硤石豈得爲懷之硤石乎今嶺下二里許有廟曰得勝殿祀得勝將軍土人言將軍姓鮑氏名東旨泉冲口有巨石曰擂鼓石高四五丈崩崖欲墜俗傳明師於此懸羊擂鼓虛張聲勢爲疑兵乃從子貢嶺間道襲取花山寨云

由花山而南曰斗嶺繚以深曰榆樹嶺端而峻其下爲阮家圩田肥美在冶湖西畔

由龍池尖而南曰虞公山居衆山之中一峰離立如笋

拔地虞公山斷而復起亦曰花山由花山而降曰柴寶山居湖之中高不及數丈遠望之若卷髻虞公山左肩南迤曰耳山山兩耳有石如播鼗故名又南迤曰小黃山三峯平列如筆格由小黃山東迤不及一里曰大黃山與東山對峙爲冶湖關鎖山體石外向如象鼻之捲焉  
龍池尖又南曰相公嶺相公者晉毛寶也西南曰七岫嶺曰石頭嶺又西曰鳳皇山自相公嶺以下諸山迴互其中爲豐禾冲爲鳳皇冲爲蔡家阪極林壑之勝  
由庫嶺而西曰斗姥尖其下爲靈源觀道士世傳禱雨術云是明何公冕所遺也

懷寧縣志

卷之五

山川

十二

由空度嶺而南曰太平山委折深鬱人徑罕通過其地者如遊太古山亦出石灰然不及韭菜山之佳西南曰俚子尖上有仙韭又西南曰九龍凸音如包盡於黃土倉潛山舊倉址也俚子尖與大雄山對峙兩山之間有村曰黃鸝村有阪曰釋迦阪其下爲拜石溪山有巨石貫塞溪源障水爲埭百夫莫撼邑紳劉尙志衣冠拜之一夕雷雨大作石落溪中因以爲名命子若宰勒字石上公卿題詠遂成故實邑人蔣雍植有黃鸝村遊記言匡廬雁蕩皆以崢嶸遐曠取勝至結構幽奇一邱一壑而具名山大川之槩莫如茲地惜潛伏僻壤遊履稀濶知者絕少耳

由大雄山而西數里曰石牛山有洞曰石牛洞有庵曰古洞庵怪石嵯峨古樹葱鬱前臨灤河遊觀稱盛山後有井泉甚甘降而平南行爲上馬嶺又東南爲營盤嶺明季史閣部札營嶺上故名里中武舉潘嘉幸曾於此助戰焉

由大雄山而南曰梅子嶺有上中下三峰西迤曰獅子山危崖壁立僅可容尼西迤而南曰侯王山又南降而平盡於天井潭亦史閣部敗流寇處

自塔嶺至此皆桑山南出之支也二支皆以獨秀山爲祖自潛岳來者也

其石牌之山則祖香茗由香茗山過鳳栖冲分爲二南

懷寧縣志

卷之五

山川

十三

出者曰稱錘山有古寨元末有畢指揮者失其名於此防禦死而葬焉今墓猶存俗稱爲畢相公墓

又南曰紗帽山端秀如幞頭與望邑接壤迤而東曰太子嶺一曰鳳山三峰鼎峙大壑窈深元明之季鄉人避亂其中寨址尙存又東曰土壇山山麓有明甘愍節公墓又東盡於白石橋

北出者曰豹子山體勢盤鬱與太湖接壤舊志言山有大栗樹虬幹參天今已亡矣

由豹子山而南曰周家山四圍平遠衆山攢互山頂有石平方如牀俗謂之果老牀

由豹子山而東曰王居山山足有古陵隧道不知何代

有石洞相傳爲漢梅福遊處

王居山之南曰騰雲山多雲氣雩禱輒應

由豹子山而北曰龍王山連亘數里土人上下名之上龍王山西迤而北曰潘山宋孝宗時有潘鍊師者失其名修真於此故名山有洞深不可測相傳潘始至洞有二巨蟒驅之潛洞中越十二年丹成仙去今洞口尙鎮以大王廟云

下龍王山之陰有墓曰費公墓費公者江西南昌人名善緣明嘉靖年間以鬻磁器爲業寄跡里中查氏持長齋萬厯九年避雨於茲山石穴石傾壓葬焉土人異之因爲表墓立廟卽以龍王之祀祀之今按費公並無他

懷寧縣志

卷之五

山川

十四

異但持齋耳乃能血食茲土龍王之祀未知其正與淫土人言墓前有小石穴恒涸每祈雨者禱之卽水出且有蝦蟇泳焉蝦則風蟬則雨試之輒驗斯亦異矣

由下龍王山而北曰馬鞍山有大石平而方俗謂之仙人牀與周家山果老牀相類

又東北曰撼船山山形如船下有長河其勢奔騰如撼故名

石牌居皖水之南上與潛太接壤其山亦多界於二邑於懷諸山不及十之一此懷山之大略也

懷水莫大於江上抵小孤下趨采石爲安慶門戶自黃石磯入懷境經西鄭圩迎江套至海口與皖水合繞郡

之西郭溝兒口至南門宜城渡始剽疾宜城者以郭景  
純遺讖名也折而東由迎江寺前順流而下十里爲王  
宣夾有兵防三十里爲帶池溝其內爲帶池湖溝江水  
以入湖也五十里爲長風沙一名鴨兒溝李白長干行  
相迎不道遠直至長風沙卽此舊有巡檢今徙治石牌  
仍名長風司風亦作楓

元揭傒斯有夜泊長風沙詩 長風沙長風不斷行  
人嗟奈君何南風正高北風起大船初灣小船喜小  
船移近大船頭不獨風沙夜可憂但祝行人好心事  
長江何處是安流茆舍參差數株柳時平尙置官軍  
守青裙老姥詫鮮魚白髮殘兵賣私酒魚鮮可取酒

懷寧縣志

卷之五

山川

十五

可沽他人心事知何如

又五里爲攔江磯江心石骨橫亘如限

會稽商盤攔江磯詩 長江如修龍蜿蜒向東下庚  
辰不能鎖其勢實雄霸天帝勅六丁挾石爲堰壩千  
尋亘縱橫萬里防傾瀉赴海得停機約束勞造化我  
行秋冬交水勢殊少謝圭角露危磯彷彿虹梁架百  
繩挽一舟有帆安敢駕長年老解事快從急溜借始  
知天地間利鈍爭一罅鎮躁免險巇解紛在閒暇卧  
看江流安明鏡光新研

昭文吳蔚光攔江磯詩 衆磯巋風湍疊石攢怪蝟

茲爲水所吞江腹森戟鏃汨汨疑爛糜陰火日煎沸

疾流既瀰淪縈波復溶瀾防之不及防與舟爲鏃礪  
太行鬱屨屨孟門瀉湍凜險巖在目睫睹者得先戒  
禍機發於陰斯害小而大動作苟或疏一觸臭厥載  
巨川無安瀾激盪繁變態利涉宜中孚旣濟發深喟  
邑人江景綸攔江磯詩 一石橫渡江江流拒不受  
濤翻煙雨昏峽束雷霆鬥瞿唐及灩澦重險復茲邁  
小孤與馬當勁絕翻居後盾抵百箭攻韉掣萬蹄驟  
飛梁截巨鼉亂帆駕高鸞雲摧沒太陰雪吼沸空竇  
長蛟悍蟠踞奇鬼挺生瘦向非根百盤誰禁勢東走  
篙師矜利涉一瞥過千溜鴻毛擲命輕魚腹憐神宥  
嗟哉上水船苦似登山仆世路乘險巖人情習避就

余生汗漫遊笑彼蹄涔陋望古一茫然耽奇百感湊  
江南山色好送客如親舊華月已船頭尊酒持相侑  
又十里爲羅剎磯俗曰太子磯宋時徙邑治於羅剎洲  
疑濱此東下樅陽則爲桐城境矣

邑人魯琢江行詩 烏沙九里十三磯白石齒齒水  
瀾瀾秋霜獨冷侍中墓曉日高懸太子祠 李陽河  
口剪江行十里攔江磯自橫暗石迴潮風力峭輕帆  
高與姥山平 蘆花初雪楓初霜白鷺孤飛秋水長  
此日中江清淺處一天風雨過重陽

其各岡嶺之水隨地異名以數大水爲經曰沙河曰皖  
水曰黃泥港大河曰長河諸小水各分注於經流之內

者也

沙河發源於潛之葉家店東下至纓河灣始大所受支流曰寶福寺河公公嶺以東之水注之曰雙龍橋河三鄉嶺墨苑嶺以東之水注之曰井田河獨秀山桑山以北之水注之

又東下高河鋪所受支流曰蔣家河茶棚嶺花香壩諸水注之曰旦山河凌家閘龍家河諸水注之曰操家坂河三元觀泉水山諸水注之河流至此益盛通舟楫成市聚焉

汪之順月夜從高河泛舟歸詩 山市小飲罷回船  
月當午揮手別故人沿流撥雙艫衆動中夜息羣蛙

懷寧縣志

卷之五

山川

十七

獨相語水光上籬落露華湛榛莽沙明林影疎岸迴  
村煙聚透迤過石梁陰森入松塢孤心託微詠頽顏  
酌餘醕悄悄傷心脾遙遙聞杜宇

又東過三鴉寺所受支流曰紅蓮溝凌家橋至高家橋  
水注之曰黃絲潭江家橋白馬陂水注之曰丹石橋泉  
陂塘綠水園王家壩諸水注之曰何家渡上青石齋人  
鋪諸水注之

又東下馬踏石所受支流曰黃馬河楓樹嶺古埂壩水  
注之曰泥湖口之子橋水注之曰鄭家河抱龍橋水注  
之曰漳泮湖婆婆嶺至陸家步水注之謂之馬踏石者  
石入湖心上若有馬跡然

又東下練潭所受支流曰姚家壩豹子嶺水注之曰福壽橋火爐尖至蔣家坂水注之曰澄潭步青溝柴水注之曰源潭河黃土嶺西梅冲老鶴柴諸水注之其分水嶺以北白麟冲之水則由桐之鳳皇橋至石鴨塞與練潭河會下達樅陽入於江

皖水有二源俱出潛之公蓋尖東源逕烏石堰下小吏港入懷境俗曰後河西源逕吳塘堰至老鴉潭入懷境俗曰前河舊志以後河爲皖水前河爲潛水其實兩川同出猶之漢東源曰漾西源曰沔及其併爲一水統名曰漢矣小吏港者以漢廬江小吏焦仲卿得名漢廬江郡治舒仲卿爲府吏其地得相及也

古詩爲焦仲卿妻作 孔雀東南飛五里一徘徊十  
三能織素十四學裁衣十五彈箜篌十六誦詩書十  
七爲君婦心中常苦悲君旣爲府吏守節情不移賤  
妾留空房相見常日稀雞鳴入機織夜夜不得息三  
日斷五匹大人故嫌遲非爲織作遲君家婦難爲妾  
不堪驅使徒留無所施便可白公姥及時相遣歸府  
吏得聞之堂上啟阿母兒已薄祿相幸復得此婦結  
髮同枕席黃泉共爲友共事二三年始爾未爲久女  
行無偏斜何以致不厚阿母謂府吏何乃太區區此  
婦無禮節舉動自專由吾意久懷忿汝豈得自由東  
家有賢女自名秦羅敷可憐體無比阿母爲汝求便

可速遣之遣去慎勿留府吏長跪告伏惟啟阿母今  
若遣此婦終老不復取阿母得聞之搥牀便大怒小  
子無所畏何敢助婦語吾已失恩義會不相從許府  
吏默無聲再拜還入戶舉言謂新婦哽咽不能語我  
自不驅卿逼迫有阿母卿但暫還家吾今且報府不  
久當歸還還必相迎取以此下心意慎勿違吾語新  
婦謂府吏勿復重紛紜往昔初陽歲謝家來貴門奉  
事循公姥進止敢自專晝夜勤作息伶俜縈苦辛謂  
言無罪過供養卒大恩仍更被驅遣何言復來還妾  
有繡腰襦葳蕤自生光紅羅複斗帳四角垂香囊箱  
簾六七十綠碧青絲繩物物各相異種種在其中人

賤物亦鄙不足迎後人留待作遺施於今無會因時  
時爲安慰久久莫相忘雞鳴外欲曙新婦起嚴妝著  
我繡袂裙事事四五通足下躡絲履頭上玳瑁光腰  
若流紈素耳著明月璫指如削蔥根口如含珠丹纖  
纖作細步精妙世無雙上堂拜阿母阿母怒不止昔  
作女兒時生小出野里本自無教訓兼媿貴家子受  
母錢帛多不堪母驅使今日還家去念母勞家裏却  
與小姑別淚落連珠子新婦初來時小姑始扶牀今  
日被驅遣小姑如我長勤心養公姥好自相扶將初  
七及下九嬉戲莫相忘出門登車去涕落百餘行府  
吏馬在前新婦車在後隱隱何甸甸俱會大道口下

馬入車中低頭共耳語誓不相隔卿且暫還家去吾  
今且赴府不久當還歸誓天不相負新婦謂府吏感  
君區區懷君既若見錄不久望君來君當作磐石妾  
當作蒲葦蒲葦絢如絲磐石無轉移我有親父兄性  
行暴如雷恐不任我意逆以煎我懷舉手長勞勞二  
情同依依入門上家堂進退無顏儀阿母大拊掌不  
圖子自歸十三教汝織十四能裁衣十五彈箜篌十  
六知禮儀十七遣汝嫁謂言無誓違汝今何罪過不  
迎而自歸蘭芝慚阿母兒實無罪過阿母大悲摧還  
家十餘日縣令遣媒來云有第三郎窈窕世無雙年  
始十八九便言多令才阿母謂阿女汝可去應之阿

女含淚荅蘭芝初還時府吏見丁寧結誓不別離今  
日違情義恐此事非奇自可斷來信徐徐更謂之阿  
母白媒人貧賤有此女始適還家門不堪吏人婦豈  
合令郎君幸可廣問訊不得便相許媒人去數日尋  
遣丞請還說有蘭家女承籍有宦官云有第五郎嬌  
逸未有婚遣丞爲媒人主簿通語言直說太守家有  
此令郎君既欲結大義故遣來貴門阿母謝媒人女  
子先有誓老姥既敢言阿兄得聞之悵然心中煩舉  
言謂阿妹作計何不量先嫁得府吏後嫁得郎君否  
泰如天地足以榮汝身不嫁義郎體其住欲何云蘭  
芝仰頭答理實如兄言謝家事夫壻中道還兄門處

分隨兄意那得自任專雖與府吏要渠會永無緣登  
卽相許和便可作婚媾媒人下牀去諾諾復爾爾還  
部白府君下官奉使命言談大有緣府君得聞之心  
中大歡喜視歷復開書便利此月內六合正相應良  
吉三十日今已二十七卿可去成婚交語速裝束絡  
繹如浮雲青雀白鵠舫四角龍子幡婀娜隨風轉金  
車玉作輪躑躅青驄馬流蘇金縷鞍齎錢三百萬皆  
用錦絲穿雜綵三百疋交廣市鮭珍從人四五百鬱  
鬱登郡門阿母謂阿女適得府君書明日來迎汝何  
不作衣裳莫令事不舉阿女默無聲手巾掩口啼淚  
落便如瀉移我琉璃榻出置前牕下左手持刀尺右

手執綾羅朝成繡袂裙晚成單羅衫晻晻日欲暝愁  
思出門啼府吏聞此變因求假暫歸未至二三里摧  
藏馬悲哀新婦識馬聲躡履相逢迎悵然遙相望知  
是故人來舉手拍馬鞍嗟歎使心傷自君別我後人  
事不可量果不如先願又非君所詳我有親父母逼  
迫兼兄弟以我應他人君還何所望府吏謂新婦賀  
卿得高遷磐石方且厚可以卒千年蒲葦一時紉便  
作旦夕間卿當日勝貴吾獨向黃泉新婦謂府吏何  
意出此言同是被逼迫君爾妾亦然黃泉下相見勿  
違今日言執手分道去各各還家門生人作死別恨  
恨那可論念與世間辭千萬不復全府吏還家去上

堂拜阿母今日大風寒寒風摧樹木嚴霜結庭蘭兒  
今日冥冥令母在後單故作不良計勿復怨鬼神命  
如南山石四體康且直阿母得聞之零淚應聲落汝  
是大家子仕宦於臺閣慎勿爲婦死貴賤情何薄東  
家有賢女窈窕豔城郭阿母爲汝求便復在旦夕府  
吏再拜還長歎空房中作計乃爾立轉頭向戶裏漸  
見愁煎迫其日牛馬嘶新婦入青廬奄奄黃昏後寂  
寂人定初我命絕今日魂去尸長留攬裙脫絲履舉  
身赴清池府吏聞此事心知長別離徘徊顧樹下自  
挂東南枝兩家求合葬合葬華山傍東西植松柏左  
右種梧桐枝枝相覆蓋葢葉葉相交通中有雙飛鳥自

名爲鴛鴦仰頭相向鳴夜夜達五更行人駐足聽寡  
婦起彷徨多謝後世人戒之慎勿忘

後河至小吏港又分爲二前爲青山河後爲灤河青山  
河由青山渡柳林渡東折入於灤河所受皆潛邑諸水  
灤河之初不名灤河由小吏港東過廣渡橋珠流河白  
洋湖諸水注之

又東過朝天閘獨秀山橫山宕以西及三橋阪諸水注  
之

又東爲石頭潭澄湖塘清河南阪諸水注之按方輿紀  
要石潭南北朝爲齊梁二國界高齊皇建二年置兵防  
禦陳太建五年廢唐武德五年復置八年廢今無能訪

其遺跡者矣

又東爲灤河鋪太平山拜石溪諸水注之自此始名灤河與青山河合南過石牛山旋渦清淺依山百折雖相距數里舟子歎乃之聲互答俄溜直行平卽瞥然鳥逝故灤溪環曲居懷景之一焉

邑令賈壯灤溪詩 草堂何事築灤西映日迴流見  
此溪亂石星河支曲岸危橋烟雨接長堤泛杯香逐  
桃花遠拂釣濃看碧樹齊更喜禹功東到處春深灌  
足野人畦

灤河自石牛山西行十餘里乃至石牌與黃泥港大河合石牌古曰石牌口宋樊若水請用浮梁濟采石先試

懷寧縣志

卷之五

山川

二十三

舟於石牌口及伐唐移置采石不差尺寸是也

前河自老鴉潭以上所受皆潛山諸水東至薛家洲與王家河下流合又東至老鴉潭與黃泥港大河合又東至石牌與後河合王家河亦黃泥港分出之支流也初分爲斗屯河由斗屯河而東爲王家河又東爲畢家河隨處得名惟王家河最著

黃泥港大河其上流太湖一邑羅溪後部龍灣諸河所總滙也入懷境豹子山潘山龍王山諸水皆注焉東逕時公渡又東爲牌樓潭又東爲鸚子港又東至老鴉潭與前河合又東至石牌與後河合自此以下無復諸河之目統名曰長河

長河東逕三枝港潛太運道也港之南爲漳湖北爲江鎮長河故道由天井潭下江鎮後漸淤淺改由今道水盛時故道亦尚可通焉

又東下牛頭港天井潭小河口梅林諸水注之

又東至石庫黃山以西冶湖所受諸水注之埭溝河下流葫蘆潭之水亦注之

又東過大勝磯龍見嶺谷神嶺以東諸水注之明史閣部於此敗流賊故名

又東爲山口鎮卽皖口也長安嶺以東至三个坡諸水注之吳嘉禾六年使諸葛恪屯於廬江皖口陳永定三年遣徐度將兵城南皖口旣又遣臨川王禧於南皖口

懷寧縣志

卷之五

山川

二十四

築城使東徐州刺史錢道戢守之宋開寶八年曹彬圍昇州遣將劉遇敗南唐援兵於皖口卽此蓋古戍守地也唐李涉嘗遇盜於此盜耳其名曰不用標奪得詩一篇足矣涉卽投一絕曰風雨瀟瀟江上村綠林豪客夜知聞相逢不用相迴避世上於今半是君盜拜謝而去  
宋黃庭堅發舒州向皖口道中作寄李德叟 黑雲平屋簷晨夜隔星月曉裝商旅前冰底泥活活野人攘畔耕蹇馬不能滑駝裘惜蒙茸俱落水塘缺孤村小蝸舍乞火乾履襪前登極崢嶸拖日飛鳥沒寒花委亂草耐凍鳴風葉江形篆平沙分派回勁筆髯弟不俱來得句漫劖劖却望同安城唯有松鬱鬱遙知

浦口晴諸峯見明雪

又東爲荷葉柴響水河注之河爲望邑漳湖下流由路灌溝達新溝委輸于此

又東爲新河口又東從紗帽洲入於江新河有二此巡撫裴宗錫所濬也皖水入江舊在皖口陵谷變遷洲渚壅塞乾隆三十七年巡撫裴宗錫於漳葭港濬永濟河導之過海口趨紗帽洲乃入江非復故道矣秦始皇浮江渡海渚括地志謂在舒州同安縣故老相傳皆以爲卽此海口也

裴宗錫濬漳葭河碑記 安慶省城距大江當吳楚要衝城西三里許曰漳葭港老河上承潛山太湖望

懷寧縣志

卷之五

山川

二十五

江諸邑之水下達大江實衆流出納之總滙漕艘商舶往來停泊之要區歲久淤積水散無歸田廬漫漶舟筏不通繫纜者每於江岸停泊卒遇暴風多有覆溺之虞是以安慶雖爲上江省會平時賈舶因懼風濤蕩激揚帆直逝過而不留商民懋遷蔑有蓄積康熙中於上游別鑿新河引水入江灘高流急舟益不得上官司土者恒蹙焉議復老河故道以公費無出不果乾隆庚寅秋余奉命撫循是邦詢民間利病衆父老咸以老河宜濬爲言乃囑方伯增君履庵總理其事測水勢高下暨人夫經費議假藩庫城工餘欸四萬七千兩以二萬兩爲濬河之費以二萬七千兩

分給安徽寧三郡典商寬期十稔起息以償仍以其  
贏充歲修經費不煩公帑而大工克舉商諸制府相  
國高公會請於朝得旨允行計河之應濬者其長  
六百三十丈有奇釐爲四段懷寧潛山太湖望江四  
邑自西而東各濬其一面濶二十丈底廣八丈而迤  
其上深隨地勢凡二丈四五尺有奇顧河水深通而  
外無隄堰以爲之衛懼夏秋盛漲江水之挾沙而入  
也爰卽取挑河棄土築堰高一丈頂廣八尺趾倍之  
所以禁外水之闌入也老河旣濬而新河不塞懼溜  
掣於上而河積於下也復於新河口截流築壩東與  
堰接計長三十九丈其崇廣之數與堰等所以禁內

水之岐洩也經始於辛卯十月四邑之民子來趨事  
不煩馨鼓萬鍤齊興閱七旬而葺事水旣東注田免  
泛溢高檣巨艦咸得所歸因復條具善後數事愧荷  
褒綸爰書其顛末並命名曰永濟河俾刻於石而  
縷其善後事宜於碑陰用示有司普美利於無窮也  
善後事宜 爲頒示河工規條勒石永遵事照得城  
西門外漳葭老河年久淤墊經本部院會同閣督部  
堂高奏准開挑并堅築壩堰現今河道深通堤工鞏  
固所有歲修善後規條合行勒石永遵  
一該河責成安慶府同知專司經理每年十月該同  
知親往逐段測量如有淺阻卽行估報請領歲修息

銀僱夫分別挑撈務足原挑丈尺并製混江龍鐵鈹四柄交該同知衙門收貯僱用民船隨時拖刷如遇升遷造入交代

一該河堰壩募設堰長四名分段看管如有殘缺責成堰長隨時取土粘補夯築堅固堰傍種植柳樹及大芒杆遇有稀少未能成活者該堰長卽稟官隨時補種不許行人折取以及舟船採伐其堰上柴薪卽於秋冬給各堰長收取以爲辛力仍將現在存活株數該同知查明造冊存案倘有地民折取堰長不報一并責革

一堤堰蔓草應俟其蕃盛盤結連成一片以資捍禦

禁止驛站馬匹及營馬放牧踐踏如有違犯該堰長稟報卽提驛卒兵役分別究處

一河內不許附近居民私釘暗椿設斷施醫致使沙泥停積如堰長地保狗隱不報一并究治

乾隆三十七年二月

其郡守張楷所濬之新河自秧草溝至桐邑三墩四十餘里康熙中郡守張楷以皖江東下十三磯洶激舟行危險爲請於中丞梁公世勳捐俸五千金制府赫公壽方伯張公聖佐觀察朱公作鼎監司王公希舜徐公光祺亦各有攸助自秧草溝起至齋墩橋止濬河六百餘丈以利停泊河成名之曰梁公河歲丁酉中丞李公成

龍繼之又捐俸二千金米七千餘石命張公督工由齋墩接濬至桐之三墩出江俾盡避諸磯之險焉今梁公河之名不著俗但稱曰新河蓋張公始終其事非梁公所得專美也

其湖陂最著者曰梅湖在三鴉寺小橋之南國初詩人汪之順故宅在焉其自號梅湖以此

汪之順許幼仲過梅湖信宿卽送往雲田阪詩 秋  
水草堂僻與君終日閒棋枰松子石釣艇蓼花灣索  
果兒牽袖烹茶僕閉關無妨催作黍飽飯好看山  
物役竟難免送君還損神滿村黃葉路一笠白鬚人  
過阪天應晚敲門主不嗔桃花潭下水脉脉老汪倫

懷寧縣志

卷之五

山川

二十八

曰孟家湖在三鴉寺大橋之東

曰高家湖在三鴉寺大橋之北其左右湖汊有楊槎牛角等名水漲實一湖也沙河至三鴉寺爲衆流所匯宋時徙邑治於楊槎洲未知卽此楊槎否

曰芝麻湖琉黃橋水注之曰方家湖碧虛宮水注之以上諸湖皆總滙於練潭下樅陽入江者也

曰白洋湖其下爲朝天閘獨秀山橫山宕以西及三橋坂諸水注之出石頭潭閘爲斗門三隄長五百八十餘丈湖內故多腴田本防後河水闌入建閘禦之閘建而沙壅湖口水不得出終年積潦遂成蕪業長爲居民病矣邑令朱士達議於閘下開河以洩水勢惜不果行

曰赤湖康陂山以東之水注之出灤河鋪

曰下馬湖上馬嶺以西之水注之出石牌

曰鉢孟湖石牛山以東梅子嶺以西之水注之出天井潭

曰麻塘湖土壇山以北龍王山以南之水注之舊出石牌今出大塘湖

曰金雞湖土壇山以東之水注之亦出大塘湖大塘湖又自受魯家坂張家壇長櫟寺諸水出望邑之埭溝河曰破月湖豐禾冲蔡家坂諸水注之出小河口

曰塌賽湖虞公山以西至遇緣橋之水注之出牛頭港曰學湖有南北二湖北湖在柴寶山之東周家巷之水

懷寧縣志

卷之五

山川

二十九

注之南湖則牛頭港汊也

曰冶湖黑山冲馬蹄冲宋家堰諸水由洪家鋪注之斗嶺牛頭嶺山夾之水由阮家圩注之冶湖之梢曰麥園湖桑山以南長安嶺以西之水由麥園湖注於冶湖謂之冶者以冶鑄而名也一曰冶廠湖漢書地理志廬江郡皖有鐵官宋時置舒州監鼓鑄銅錢皖故產鐵產非一處鑄非一地鐵爐墩銅牛井皆其遺跡今湖外石庫鐵屑堆積如阜居民往往掘得古錢累千百枚其爲冶廠較然稍西有阪曰煉成亦謂冶鑄之成也廠長音混流俗傳訛遂妄指湖邊荒塚以爲公冶之藏矣  
曰丁沾塌楊林頭科甲冲之水注之

曰蝦子港頭个坡至三个坡之水注之出山口鎮以上諸湖皆會皖水入江者也

其不與沙河皖水合而自入江者曰石門湖石門湖所受支流海螺山孫家坂東西廣村諸水由大橋頭注之紅廟坂牧馬嶺諸水由馬槩石注之桑塘冲蓮花鋪丁家山車津澗諸水由高橋注之總鋪坂沈家巷諸水由老虎澗注之湖於懷山水最據其勝右大龍左百子每蓼花開日扁舟載酒不減放棹山陰石門秋泛亦懷景之一也

邑人阮自華石門湖詩 天高氣迴楚聲哀盡挾飛仙載酒來山鎖朝霞清吹發波含墜日錦帆回荒江

懷寧縣志

卷之五

山川

三十

蒲柳秋先到斷岸芙蓉晚更開太守近時慵佐客黃花籬下苦相猜

邑人方都鎬石門秋泛詩 一湖烟水千山亂峭壁雙開萬頃秋紅蓼灘頭鷗鷺起有人撐出打魚舟棹入蒹葭夜色清前峯月吐半湖明醉眸遙指回舟處燈火疎林犬吠聲

石門湖之委爲漳葭港漳葭港又自受支流自獅子口外阮家冲郭家圩鄔家圩諸水皆注焉由四顧墩東下大新橋入於江

其循江東下洲渚之間港汊所在多有皆江潮倒灌自海口入者曰菖蒲夾迎江套地脚湖楊家蕩畢家套由

帶池溝入者曰帶池湖江家梢洲浦夾由鴨兒溝入者曰小港泉潭夾西夾湖墩子湖司公夾長湖皆水壯則成湖水殺卽以所入之處爲尾閭焉

其雖由江潮倒灌仍有山源者曰菱湖在東郭外新寨嶺以東至南莊嶺諸水注之由段塘湖出長楓港段塘湖又自受野螺橋游家嶺黃土壩諸水出長楓港謂之菱湖以多菱得名也盛開時花光水氣清暉娛人越女吳歛棹歌響答郡士大夫每以秋夕扁舟載酒延眺忘歸菱湖夜月亦懷景之一矣

許蕢菱湖詩 紅蕖含宿雨香艷正離披何處采菱女相將歌竹枝花深看易失風亂聽還疑響徹碧雲

懷寧縣志

卷之五

山川

三十一

散空波月上時

魯琢菱湖詞 采菱采菱菱湖裏菱花古鏡涵秋水白雲散作明鏡光青天倒作明鏡底 上湖蓮花紅似拳下湖蓮葉綠如錢爭道蓮花勝蓮葉花開易落葉常圓

汪之順送魯啟我歸菱湖詩 烟樹迷茫黯落曛詩人歸思正紛紛城頭霽色消殘雪江上寒潮濕暮雲且喜布衣成聚首不將杯酒悵離羣扁舟曉向菱湖發折得梅花欲贈君

曰槐茨湖石山寺以東段家山以南之水注之

曰魯家汊石山寺以北南山柴以東之水注之

曰秦潭湖余家橋九郎廟諸水注之皆出長楓港長楓港又自受黃家塆盧家戶諸水下梅林破港達縱陽河入於江

曰荔潭湖汪家山之水自南來注之柘澗山之水自東來注之出三墩

曰張家塞長山柴孟家坂諸水注之出三墩塞有三十六汊衆流之所匯也

曰石塘湖棗園以東門山以北諸水由谷家橋注之蕭家塆蔡潭柴諸水由寒潭泊注之白草湖烏林墩諸水由江家壩注之下縱陽河入於江

邑人任塾有石塘泛月詩 忽到秋多處孤舟去復

懷寧縣志

卷之五

山川

三十二

停月臨湖更白山入夜偏青潮接高低岸波含遠近  
星魚龍方寂寞隨意泊山汀

黃浩浩石塘道上詩 沙柔莎嫩草萋萋鎮日閒行  
信馬蹄酒旆夕陽風上下杏花春水路東西耕雲老  
犢成羣放喚雨陰鳩自在啼便與漁翁長結伴問津  
何必武陵蹊

其井泉池塘最有名者井曰施家井在井田坂大路旁  
其味清甘盛夏行人藉以解渴

曰巨峽口龍井廣盈畝深窅無際每雲氣滃滃然起卽  
雨候焉其下流爲井田河

曰汪家牌龍井曰潘家河龍井其旁皆有染肆以井水

濯布比於蜀江文錦

曰女兒井在長安嶺半春夏日行者登陟至此小休一  
勺蠲煩咸頌功德水矣

曰龍眠庵井在鬚鬚尖之腹筭以入厨不煩縷級其下  
流爲龍眠塘

曰銅井在齋人鋪蓋古採銅鼓鑄之所後遂澄爲井矣  
曰范家井在康陂山有上中下三井聚族而居者皆范  
氏

曰魯家井在門山新塘下源泉四時不竭

曰讓泉井在西郭外汲者爭則竭讓則湧故名康熙中  
巡撫徐國相建亭其上曰澄碧亭有記今廢

懷寧縣志

卷之五

山川

三十三

徐國相澄碧亭記 予撫皖之七年飲於皖水而甘  
問之皖人得於郊西二里之近其左右環峰綿亘下  
則深谷窈窕泉出山麓一泓渟然與惠山爭勝飲之  
可以理煩疴蠲痼疾取而飪物味終不變內外居民  
咸取給焉按圖經是泉爭則涸讓則湧汲者依序而  
進各得充盈苟兩器並舉輒濁而竭使民不得不讓  
故讓泉之名郡志載之夫讓美德也周禮大司徒以  
陽禮教讓則民不爭而五行中於泉尤得讓之義隆  
寒必溫炎暑則涼撓之不濁挹之不損細流涓涓江  
河同潤老子曰上善若水利萬物而不爭然則置身  
廉讓之間非君子是則是效者乎皖爲江淮上游子

初至之日舟車絡繹卒伍雲屯屣履餽糧絜皖是賴兼以疫癘間作饑饉不時賑卹撫綏日無窮晷今者仰賴 廟謨神武氛祲廓清六合以內薄海之外莫不底定瘡痍旣起役夫其休民於是乎爰居爰處或喟或歌膺膺其原眇眇其隰山靄而青水環而碧陂塘烟火庶物漸殖而予又上體 聖天子之意與民以無事凡茲數千里之內歲時豐登民物安樂疇非 朝廷休養生息之所致也予旣得斯泉於山谷間恐其爲驕陽行潦之所侵蝕落葉浮槎之所填委爰作亭以覆之顏曰澄碧非第愛泉也蓋樂斯泉之教民以讓也夫天下名區勝跡湮沒於窮山絕壑者何

可勝數或物不能自見而因人以彰或物本可貴而因人益重讓泉之水實與惠山埒而陸羽張又新品泉皆不之及安知不借予輩而傳乎於是亭成而爲之記

曰風節井在按察使署後余忠宣公夫人率女安安死於此康熙中臬使朱作鼎爲亭覆之題額曰一家仁

曰館驛泉在康濟門外

曰受福泉在安慶衛東

曰高井曰沙井曰板井皆都市井也凡鄉村之井皆山脉所溢味甘而冽鄉人猶食流水不食止水都市之井則鹹鹵矣淮南子曰江水肥仁俗傳惟白雲巷前四眼

井濱江與江水無異焉

塘有澄湖塘在清河南岸自庫嶺折而北曰漆樹嶺嶺脚數十百條撐拒各成小汊滙于一塘廣才十餘畝而演迤洄洑流覽不盡焉

有數魚塘在十八里廟雙塘相連明道士何公冕有異術蓄魚塘中每日叱魚由東塘過西塘數其尾數故名有鴨兒塘將軍冲麴兒嶺諸水滙於此四時澄瑩方平如鏡歲有魚課歸義學

有清水塘余忠宣公盡節處也一曰盡忠池池有渠與大江通渠有橋爲前後兩廛通道先是官漁其地以爲利嘉靖間郡守吳麟革其陋樹碑當途久之環池居者

懷寧縣志

卷之五

山川

三十五

坌垢下積渠壅不流每淫雨暴漲或苦沈竈萬厯中郡守胡纘宗廓清舊址邑紳容若玉爲之記 國朝康熙間郡守張楷復加碑焉又地藏庵前亦有池或謂忠宣公盡節在彼前邑令張懋誠曾築亭其處表之而實非也張楷記特爲此而作以正其誤池前之渠其水以染紅最鮮近日蘇杭染者皆就此染焉

洪亮吉清水塘弔忠宣詩 野人告我清水塘日暮塘邊屢回步雉堞丹樓不見人坊祠碧瓦同寒戍殘碑無文首函鐵傳有中書舊時血報道潮聲入小孤靈風夜火紅旗掣嗚呼江潮翻黃海潮紫海上琴隨

伯牙死

秦不華姓伯牙吾台氏家僮抱琴從死

愛子同歸北闕魂老臣

尚曳東華履當日承明踵後塵和州遷謫感羈臣崇  
碑欲紀先朝烈簪筆誰歸後死人

有漂白塘在地藏庵後染布者皆先於此沃之暴之  
有飲馬塘在北門內三塘相接爲官園浴馬之所  
有九曲池在東門外石橋港邑紳阮自華常泛詠於此  
有白蓮池在藩署後向爲邑紳笱茹穎別業白蓮最盛  
後屋歸他氏池閉屋中百餘年來幾無能指其處者矣  
右所列池沼雖有潤下之益未盡澤物之功其陂塘隄  
堰足資灌溉者別見於水利門此懷水之畧也

名勝

邑十二景 石鏡涵空龍山曉黛杏村春色百子晴嵐

懷寧縣志

卷之五

名勝

三十六

冶峯青靄灑溪環曲海門夕照石門秋泛菱湖夜月大

觀遠眺

俱詳本卷

雁汊漁燈

越江五里壤接東流蘆葦叢生陽鳥羣集漁舟夜泊燈火熒然

塏影橫江

在迎江寺倒影入江然燈之夕射彩如虹

大觀亭在正觀門外余忠宣公墓右明知府陸鈞建推  
官李欽吳有記言江山歷世不變而風景之奇則有時  
而顯其勢數固出於天亦由夫人之爲之也舒州自古  
有名山大川而大觀之景則以今時出是豈偶然之故  
哉蓋四明陸公大觀之人也人與景以時而會也公始  
至舒值民經大軍凶年之後力爲息肩示以簡易治舒  
三歲民日益裕近於余忠宣公祠之西得隙地焉慨然  
歎曰是足以覽一方之勝何蔽於此耶今民少康而一

郡遊觀之所亦不可無也乃役官徒作屏攘剔臺其中而亭其側隨勢低昂繚以短垣因山高下翫以曲道一時士大夫從公來遊俯瞰長江一瀉千里閭閻夾岸檣舳迷津皖中風景俱若踴躍奮迅而出也公曰是亭名宜大觀命欽昊記之云

康熙甲子巡撫徐國相重建有記 出西門二里而近是爲忠節坊元忠臣余公廷心之祠墓在焉其地負山面江踞一郡之勝祠後舊有亭名曰大觀爲往來登眺之所後燬於兵夫皖固江淮形勝之區而用武之地也自元失其政汝潁先鳴蘄黃響應魚書狐鳴之徒雲集霧會公以一介書生提一旅之師蔽遮

江淮阻遏敵勢六年之間大小二百餘戰當其破雙港復縱陽屢敗趙普勝陳友諒之兵於危城之下何其壯也旣而孤軍無援糧絕城陷合門殉節爲有元忠臣之首又何烈也今天下太平久矣 聖人在御神武布昭梯航萬里尉候無警載戢干戈樓船下瀨征南橫海之軍還諸宿衛凡至幢檠之宮芻茭之廩盡斥歸之於民而民於其間出作入息歌咏太平仰前哲之遺風憶登臨之樂事未嘗不思復覩名勝也予公餘之暇偶來斯祠愛其地之高朗恐往蹟久而遂湮於是疏榛莽闢瓦礫相西北隅而增築之治亭於上仍其舊名母廢前人母侈後觀復敞亭之四隅

以眺望焉見夫巖城翼翼烟火萬家江流如練奔騰  
澹沱羣山絡繹綿亘遠近列屏凡大龍百子天柱九  
華諸勝皆可坐而數之將古所謂仰觀俯察處高見  
大者其在於斯歟夫表揚前賢修舉廢墜守土者責  
也况余公之忠烈百代不泯者乎亭成合僚屬以落  
之其時襄厥事者署江南安徽等處提刑按察使司  
分巡鳳廬道副使加一級孫君蘭協鎮江南安慶等  
處地方左都督管副總兵事仍帶記功六次軍功二  
次郭君文魁知安慶府事加一級劉君檉知鳳陽府  
事耿君繼志同知安慶府事田君時芳通判安慶府  
事王君國寶懷寧縣知縣崔君維衡例得並書

懷寧縣志

卷之五

名勝

三十八

康熙庚寅邑侯張懋誠重修巡撫葉九思賦詩其上  
一時和韻極多

郡守何鼎詩 追隨名勝地極目楚天高宿雨留春  
漲晴雲鎖石濠風恬江岸濶波靜海門牢灑翰成珠  
玉超然壓俊髦

邑人李荃詩 極目雲霄上嵐光入檻高野田青近  
郭江水白通濠地控三吳重山撐半壁牢中丞吟咏  
好賡和遍時髦

其他詩人墨客攬勝登樓罔不涉筆今就見聞所及擇  
其尤雅者錄之以資吟諷

朱筠大觀亭東巡撫裴公并東布政楊公按察瑋公

詩 大小龍北來山走長江負澹澹舌飲江茲亭壓  
其首安慶城口銜扼吭吞江九匡廬挾小孤驟擊此  
應肘近代寇屢禦救急艾急灸峩峩新建伯覆舟寧  
庶杻雲雷經綸以 國初殲海醜南邦一都會緊郡  
封疆守大觀亭壯哉舉杯江在手羣公此高宴招我  
樂侑酒魚龍下仰聽簫鼓徹沈罍天風送飛揚隔岸  
曳秋柳海門去千里一寫金焦瀏昔有元末造余公  
藏孤阜忠貞歲秩祀有司薦亭右踳踳老太樸看廟  
一何壽江山寶鑒之彼此孰是否裴公綠野哲楊塘  
協寮友鄙人獲陪遊清時享敞帚懷古各勗勉選勝  
及旨有臨水箴繼火出辰懽極酉善賦大夫志題亭

懷寧縣志

卷之五

名勝

三十九

以永久

朱珪偕汪靜厓編修游大觀亭作 春雨四郊渥春  
陽萬物熙出郭烟戶靜祇謁豳公祠登樓俯長江萬  
里導峨眉浩浩歸大海逝者長如斯憶我初來此九  
度星躔移皖山不改色江樹花滿枝大觀善無量上  
達階有基願言同心子好修勉自知  
黃景仁登大觀亭詩 山色殊春秋江聲無晝夜佳  
哉皖公城山水莽雄跨障擁淮淝高勢與荆襄亞崇  
臺得壯觀 睫足吁訝沿堤十萬戶盛氣相激射飛  
浪過檐頭轟雷聞枕罇回首皖公宅潑翠滿楹榭炊  
烟自成雲不與江流瀉龍爲徹夜吟鶴夢橫江化水

寒沙淨間茫茫感代謝得堦懷伯符升城面興霸人  
雄及地勝憑陵不相下驚焱卷旌旗寒雲收叱咤徒  
令懷古心淹此趨途駕

姚鼐大觀亭詩 中丞祠倚石厓青杖策秋風更一  
經舉目衰林如脫髮幾人采菊制頽齡清江三面舒  
州郭南岳千峰皖口亭落照橫天鴻雁起獨憑長嘯  
對冥冥

邑人金永重建大觀亭詩 清遊夙夕欣徜徉家山  
路緣壑復近溪卽景多所悟城西亭新成尋幽振杖  
履飛甍結層霄光彩映朝暮直北數高峰峭崿雲深  
處面南環大江天水相回互檣影動晴虹夕陽孤雁

懷寧縣志

卷之五

名勝

四十

度廣陵濤有無潯陽朝可泝聳身白雲巔庶息塵中  
慮梵宇旣崇嵬旛幢復高據疎木間寒鐘翛然有奇  
趣片雨沐江光明滅江村樹抱琴入長松幽人託情  
悽淡月吐遙岑嘯傲漁舟去

邑人余鵬飛與弟鵬翀大觀亭聯句 樓高俯城闕

飛鵬登眺出人烟翀鵬岳色三春漲飛鵬江聲九派懸翀鵬人

歸吳楚外飛鵬僧老薜蘿前翀鵬林鳥翻飛起飛鵬鐘聲散

遠天翀鵬

魯琢大觀亭詩 江鄉易作雨延眺恰新晴五月寒  
猶在孤亭水漸生林巒藏夏氣吳楚接潮聲不盡蒼  
茫感憑高發古情 赫赫忠宣墓堂堂文肅祠斯人

不可作來者復爲誰氣象江天領心情魚鳥知熙州  
落眼底步履細尋詩 路折千盤磴人依四面窗樹  
頭還著樹江外更通江遠席迎風落疎鐘帶日撞忘  
機羨鷗鳥來去一雙雙

查鉞夏日登大觀亭 荒祠最深處一徑上幽岑老  
樹結夏綠空庭生午陰到來忘薄暑久坐動微吟下  
有安禪室時聞清磬音

大觀亭右畔有榭一楹舊名停雲舫今圯

魯琢有停雲舫和宛林詩 子亭何日構疑是汎虛  
舟雲影半空住江聲在下流秋風吹渺渺夜月照悠  
悠李白驚人句高歌最上頭

懷寧縣志

卷之五

名勝

四十一

自乾隆以來歷有修葺道光辛巳邑令陶沅大加增飾  
巡撫陶澍郡守汪恩皆有楹聯名公卿讌會必於此攬  
勝焉江山之靈與簪裾之彥相映發矣

上達樓 在大觀亭左舊名更上樓乾隆壬子巡撫朱  
珪重建更今名

朱珪雪中謁余忠宣公祠登上達樓柬同官詩 江  
天漠漠清無風岸樹羣歷烟濛濛層階拾級大觀界  
禮謁勝蹟先孤忠公以偏師抗三面盡室同心酣巷  
戰騎箕不肯返星辰江上靈旗麾雨霰登樓咫尺接  
上清雪花萬片搖空明梅枝吐萼竹壓翠千里牟麥  
知登成城郭江山好風景清賞如斯共管領與人同

樂先民憂高歌歸路山公醒

鎮皖樓 在樅陽門外迎江寺墦左康熙甲子巡撫薛  
柱斗建

提學吉水李振裕鎮皖樓記 皖濱江重地也上控  
洞庭彭蠡下振石城京口分疆則鎖鑰南北坐鎮則  
呼吸東西中流天塹萬里長城於是乎在從來形勝  
之地必有巍峩雄傑之觀以收攬其風物而吐納其  
江山然非有壯猷偉畧博大深沈之人爲之經營而  
措置焉則其功必不成卽成矣亦不能規模壯麗極  
一時之盛而副形勝之奇是爲難也皖城東門外向  
有樓名中江屋廢而址存非一日矣中丞薛公前觀

懷寧縣志

卷之五

名勝

四十二

察茲邦時時命車來憩徘徊瞻眺欲有所經營會席  
未煖擢南楚方伯去未幾復來撫整綱飭紀布德宣  
風所謂駕輕車就熟路者蓋公於此方利害知之也  
有素而爲之也無遺於是出游刃之暇面執鳩工捐  
俸以集事而苞茂之象遂成之不日如湧地而出也  
公素精形家言其建此也非第爲游觀宴集之計蓋  
謂長江東下與海通波有皖城以爲門戶而不有筦  
束乎門戶之地者則其勢不止而其氣亦不聚公旣  
爲全江畫善策奠磐石於無形而復於斯地樹巍峩  
雄傑之觀以補形勢之所不及公之爲皖民計深且  
遠也如此樓旣成署曰鎮皖余適以校士來過公爲

余傾蓋登此樓則長江萬里所謂鎖鑰南北而呼吸東西者吳楚山川坐而畢攬焉而其規模壯麗又極一時之盛而極形勝之奇爲僅覩也余鄉洪都滕王閣負郭面江亦千秋勝概而數經興廢屢建而不永於觀若斯樓之成揆地勢而協人心事與時偕功與道俱當必爲神靈所扶持與我公之惠愛聲名歷久而不敝豈徒甘棠之樹勿剪勿伐而已哉詩曰愷悌君子神所勞矣敢以是爲公頌

又丙寅夏日薛中丞招飲鎮皖樓和壁間張敦復前輩韻 百尺朱樓俯碧川擁旄來鎮憶當年夕陽斜對千帆影曉霧平分萬井烟畫棟詩憑滕閣賦銅鞮

懷寧縣志

卷之五

名勝

四十三

歌與習池傳政成消夏宜高卧九派江聲到枕邊  
邑人魯琢鎮皖樓眺江南諸山詩 高樓拄頰曉光  
開一片閒雲墮酒盃積翠浮蒼吟不了萬峰飛影渡  
江來

中書舍人桐城陳焯有鎮皖樓賦并序其畧曰地靈人傑說不昉於彤家踵事增華功乃合乎天造郡之東郭實滙衆流舊有雄樓建同寶塏標萬丈之傑構對千巒之奇峰匪特映帶有方勢無偏重抑且朝宗得位體尙獨尊兵燹以來浮圖僅在利用大作時至斯興大中丞薛公念旌節之重臨會壯觀之待復特允二千石劉侯所請首捐冰俸大庀壞材簷啟三重

梯翔百仞程工集事浹月告成華榱拂雲綺窻耀日  
江山奔赴估舶鱗臻淑氣爲之昭回民物因而加阜  
云

調元閣 在康濟門外亦巡撫薛柱斗建其下卽宜城  
古渡也

桐城陳焯有記 大中丞薛公涖皖之初年冬十月  
旣建鎮皖樓於東郊越三旬康濟門外復營傑閣告  
成上啟重簷下達四衢朱拱丹梯崢嶸燦閭綺疏洞  
闢各用一字睂之曰霽曰熏曰爽曰肅以迎二氣以  
和八風於是乎在非爲飾觀瞻宏眺望已也明年春  
龍眠陳焯偕其客挈榼攜壺來登是閣徜徉徙倚樂

懷寧縣志

卷之五

名勝

四十四

而忘歸客曰調元之義大矣用題是閣意必有取可  
得聞乎余應之曰揆諸方隅厥旨良允何也蓋帝出  
乎震說言乎兌相見乎離今鎮皖樓峙於東震位也  
物之所資以生大觀亭峙於西兌位也物之所恃以  
成而是閣也居出治嚮明之地暢萬物相見之機苟  
非特立中央洪鈞轉播斟酌太和則生者何由鼓其  
橐成者何由善其藏也聞之調元者宰相之事也入  
居政府則元氣運於巖廊出鎮方州則元氣周乎蔀  
屋今雖偏隅之皖數仞之閣而公旄節駐於斯燕賞  
臨於斯歌詠寓於斯卽燮理存於斯署以調元可不  
謂允乎且甲子逢年上元叶瑞公以顓俊南國邁

東巡之盛典承扈蹕之寵光歸而適成是閣時至事起用錫嘉名義兼有之則是閣之稱紀地勝也昭職掌也慶遭逢也一舉而三善備矣客乃迥然喜日有是哉請書之爲記

道光二年邑侯朱士達重修

四宜亭在樅陽門外大士閣前邑侯馬剛建劉餘謨大士閣記言江水自岷山發源經數千里汪洋澎湃過小孤滙海門漸委折以朝宗皖據雄圖俯瞰長流直襟帶然第岸北循江而東一浮屠聳立外更無高山大麓可砥柱狂瀾又兵燹後樓臺亭榭都委榛莽城隈之左遂荒寂無復壯觀侯以高第令懷百度具舉政修人和登懷寧縣志

卷之五

名勝

四十五

眺所及見皖東偏一隅較薄特建大士閣而前構四宜亭江山千里悉羅而致之廊廡間凡帆檣往來騷人墨客莫不檣舟遊憩心曠神怡矣

馬剛四宜亭落成詩 亭砌連香閣江烟接寺樓一番雲水意幾處夕陽舟清讌芙蓉晚高談竹葉秋同人爭攬勝未覺此淹留

陟園 在正觀門外萬松山邑紳錢選建以望親瑩者名之曰陟取岷岵之義也孟安世有記言園內清池一朶映以朱欄前後有堂一祀關侯一供佛堂左忽闢雙扉細路短垣人行牆外花迎拂面進憩小亭四窻洞啟盆花砌草爛熳四時酒竈石床足以延客小却有堂盈

尺潔不容唾聲傳響答如坐石谷左右斗室陳列書史  
櫺戶交通率皆偃仄斂束如入壺天及度層梯登高樓  
凡四山之窈邈大江之潏洄近收几席東日初升望西  
關雉堞江上樓臺皆含金色而葦渚沙汀山橋茅店賈  
舶漁罾悉見於海門落照間近郊牧笛鄰寺鐘聲都供  
清聽樓外平臺可坐十餘人明月在天澄江如練朋尊  
吟嘯坐卧不能去計園四周僅畝餘耳而意匠經營遂  
藏曲折此陟園之大概也遊觀之樂極於是矣而錢子  
實未嘗一日有其樂也陟園之作凡以瞻望岷岵而歎  
恨於風木之弗逮焉爾

邑人楊汝毅陟園詩

西郭有佳園巋然倚山脊營

懷寧縣志

卷之五

名勝

四十六

構自何年一室才盈尺傑閣忽然開俯視江痕碧荻  
岸接遙岑烟嵐生曉夕檻前晴雲飛天外孤帆射綠  
樹交清陰鳥語接几席微風過妙香梵聲出金石主  
人時復來悠然此中適

又和錢鶴亭先生陟園詩 人生焉用百年身屈指

無多繞膝辰獨有先生真孺慕絕裾齧臂是何人

陟園高處望松楸黯淡寒雲繞一邱莫詠蓼莪明月

夜恐驚烏鳥叫枝頭 鬱葱佳氣靄愚峰西望時虞

鹿觸松卜兆已成君莫憾暮雲寒雨獨愁儂

其舊有而今廢者

萬松山房 在正觀門外宋馮京讀書處太平寺後山

日萬松山

天開圖畫亭 在正觀門外面江負山踞一郡之勝元  
余闕安慶郡庠後亭讌董僉事詩自注亭名天開圖畫  
是也

詩曰鯨鯢起襄漢郡邑盡燒殘茲城獨完好使者一  
開顏省風降文囿弭節遵曲干雙池夾行徑累榭在  
雲間天淨羣峰出地迴滄江環霞生射蛟臺雁沒逢  
龍山開樽華堂上命酌頰危闌主人送瑤爵但云嘉  
會難豈惟盃酒歡樂此罷民安魄淵無恒彩清川有  
急瀾明晨起驂服相望阻重關

又三月二十九日郡庠後亭讌盧啟先僉事詩 晨

懷寧縣志

卷之五

名勝

四十七

集欵江渚列席當蕙樓斯亭信顯敞翠嶺帶澄川潮  
駕宜城步山積司空原青松紛被徑紅桃競發園衆  
竇起爲壽鯨鱗出嬌絃中腸念遠離歲行已再遷漂  
萍有時合浮雲未見旋今朝不爲樂來會知何年  
按安慶府學元時在正觀門外後因兵燬至明移建  
山谷書院卽今府學也康熙中郡守張茁重建尊經  
閣議復天開圖畫亭而不知非其故處卒亦不果建  
云

超然亭 在雙蓮寺後

元虞集雙蓮寺超然亭詩 超然之亭何所超雙蓮  
古塔共岿堯城頭疎雨散花至江外斷雲將樹朝晨

飯舊從香積化晚鐘長送海門潮尋源悵望空歸去  
此地安禪試往招

天柱閣 在正觀門外明郡守胡纘宗建登閣西望天  
柱巋然

纘宗有登天柱閣詩 與客上江樓橫江山欲浮雲  
當天柱出月傍小孤流帆外收吳楚樽前落斗牛瀾  
漫忽千里倚檻思悠悠

茶陵張治天柱閣詩 何人建閣俯江水千尺飛騰  
出皖州高下乾坤自清濁東西日月共沈浮兩峰倚  
劍尊前落九水如絲天際流閣上主人能愛客南風  
長日繫扁舟 昔聞天柱峰今上天柱閣迴席倚雲

懷寧縣志

卷之五

名勝

四十八

河移尊動溟弱赤日海上流青天鏡中落凭高發孤  
吟長風墮寥廓

又天柱閣聽可泉詩話 李白獨吟秋浦上杜陵多  
在錦城隈夜深長嘯倚高閣明月墮江潮欲來

紫玻璃亭 在雙蓮寺後松下明劉若宰讀書處夢文  
昌以紫玻璃授之後果以第一人及第因名

中江樓 在鎮海門外江磯之顛明郡紳阮自華建結  
海門大社於此

得月樓 亦在鎮海門外巡撫薛柱斗建

寄園 在城內東北邑紳任國禎別業其孫壩後改名

逸園

顏素題任大參寄園詩 今朝風日好乘興入林園  
遠徑分花嶼通池接水源神仙留秘錄鷗鳥足清言  
自得幽栖意爲廬不避喧 客至頻呼酒時和但捲  
簾暗香浮綺席清韻上瑤編草際雲英度花邊空翠  
懸抱琴孤月去扶醉欲僊僊

霄漢樓 在鎮海門內邑紳任塾購廢址爲園名之曰  
杞將母之意也中豎樓曰霄漢縹緲欲飛江山滿目  
任塾霄漢樓詩 振衣一長嘯此地恰宜樓山以全  
身獻江從半壁收未晨先見日當暑忽成秋夙有滄  
洲約憑窻可坐遊 危栖百尺頂似與鶴爭巢霧幔  
晴猶濕風窻夜自號江光歸匹練嶺色入秋豪一握

懷寧縣志

卷之五

名勝

四十九

誰同測孤雲兩角高

錢澄之任克家霄漢樓成索詩 任華高閣頰城開  
楚水吳山面面迴日射丹題明塔寺煙籠碧樹隱樓  
臺憑闌月湧三江上解帶風從萬里來暢好炎天時  
有客八窻洞啟與銜盃 半帶江流半枕湖此中少  
得此樓無春雲欲起龍山暗夕照將沈雁汊孤燈火  
每隨賓客散板輿長共弟兄扶臨風忽有吹簫興黃  
鶴天邊似可呼 烟渚迷茫一氣浮江聲樹色海門  
秋置身祇覺雲霄近傾耳疑聞河漢流沙上渡迴欵  
浪過雨中帆滿趁幫收何人不羨任公子日日垂竿  
坐上頭

姚鼐霄漢樓 三十年前登此樓招攜綠鬢賦滄洲  
四山雜樹排簷入萬里清江抱郡流過眼雲烟窺物  
外凭欄花鳥又枝頭層軒尙有斜陽白更就明霞望  
逝鷗

三江第一樓 亦任塾別業

養園 邑紳魯琢築在三江第一樓前琢有詩云養園  
我築大江頭恰擁三江第一樓是也名之曰養取養身  
養心之義

余鵬飛養園爲魯明府賦 得養無不長難教一物  
違看君謝塵組素襟甘掩扉蒔花揚春芳種松凌霜  
威朝起灌漑罷讀書無是非江光澹渺慮山影明涵

懷寧縣志

卷之五

名勝

五十

輝茲園卽柴桑城中見逾稀時還詩與酒待我同攀  
嶂

涌月亭 在西城外山顛顏吏部素別業

藤墩 在東城內舊有大樹覆墩垂藤如繖劉靜遠別  
墅

舫亭 在鴨兒塘吳應鍾孝廉別業

應鍾有舫亭晚霽懷朗師詩 秋水才深五尺強雨  
餘小艇帶斜陽呼兒促棹前村去貪共山僧納晚涼  
霞上 在大龍山如是庵之背邑人方都韓讀書處  
見一亭 在科甲冲進士江同海同淇讀書處

冢墓

余忠宣公墓在正觀門外公死賊義之求其屍清水塘  
中具衣冠葬此明洪武八年封表危素之降也後朝帝  
聞簾外履聲橐橐問爲誰答曰老臣危素帝曰朕以爲  
文天祥也命往安慶守余闕墓 國朝知府李士禎重  
修康熙己亥知府張楷復甃石爲壙雍正己酉臬使劉  
枏加石闌焉道光辛巳邑令陶沅又重修一時名公卿  
多有憑弔唱和之作

巡撫孫爾準詩 舊是提軍百戰場至今忠節尙名  
坊乞師莫援孤城陷湛族猶餘一水香祖逖曾聞留  
赤裔桓彝爭說祀丹陽七年想見登陴苦潮咽山根  
落日黃 小孤門戶似當時憑弔猶令異代悲埋骨

懷寧縣志

卷之五

冢墓

五十一

崇邱齊泰岱握拳遺像凜鬚眉睢陽何似雙忠廟劉  
尹重修至德祠我欲增摹危太樸履聲如聽到堦墀  
布政使今任巡撫陶澍詩 蘄黃兵氣久紛紜六載  
孤城抗楚氛裹革竟能偕婦稚死綏誰肯負將軍塘  
邊寂歷圍荒草江上蒼茫走斷雲太息杏花虞學士  
生前事業早知君 高墳矗矗倚崔嵬彷彿當年立  
馬來尙想青陽藏草舍劇憐輦谷久蒿萊河山欲灑  
新亭淚風雨猶聞壯士哀千古睢州雙廟近韓公祠  
下浪如雷

故廬州守劉珊詩 怒濤千古挾軍聲一旅曾櫻四  
面城上將星辰營陣結小姑風雨墓門平登陴義激

殘民慟却盾恩深死士傾誰識牙旗還聽講當時裘  
帶氣縱橫 一角孤城倚麗譙江天極目莽蕭蕭魚  
龍出沒靈旗偃猿鶴淒涼宰樹搖骨肉九原同尺土  
干戈七載枕寒潮故鄉我是廬江吏淚灑西風賦大  
招

知宣城縣查揆詩 七年宣慰繫安危青史因公一  
涕垂吳楚蒼黃殘局盡江淮彫劫幾人支孤軍海上  
田橫島太守城南許遠祠歎息鞞刀揮手日天魔按  
舞正酣時 江亭秋序劇崢嶸清水塘西結構成往  
事但云陳涉起有人還媿褚淵生一家兒女風雲氣  
百戰兵戈草木聲我似翟湯千載下墓門來酌卞忠

懷寧縣志

卷之五

冢墓

五十二

貞

忠宣公墓前左爲李宗可墓右爲馬卒墓舊俱失其處  
明知府胡纘宗訪得而封識之又臬署西偏有二壘相  
傳謂是風節井中遺骨嘉慶九年臬使鄂雲布爲樹石  
碣護以朱闌焉又郡郭西北隅城上嵌有碑石云淮西  
帥府令史常景元墓旁綴至正十四年正月十六日卒  
康熙五十九年知府張楷壘石樹碑表之  
韓建墓在康濟門外江濱亦明郡守胡纘宗訪得而封  
識者胡公有碑表言是墓沒於民間久矣纘宗謀諸鄉  
大夫士訪諸父老旣逾歲廉而得之又逾歲懼其復沒  
也表而識之其前有堂三楹其後有室三楹其左有舍

二楹其廣四丈有五尺其袤一十七丈有五尺卽今之韓公祠也

明邑人甘霖墓在土壇山

顏素墓在石牛山

劉尙志墓在小龍灣

阮自華墓在寶靈山

吳嶽秀墓在古角城

汪道亨墓在西郭外赤帝廟後

汪鑾墓在北郭外齋巴樹

宣國柱墓在太平山

任可容任竣任塾墓在沿山任之燦任國楨墓在磨山

懷寧縣志

卷之五

冢墓

五十三

江襟楚墓在雲田高坂

楊汝穀墓在石門湖紗帽山

馬大用墓在蕭家塢迴翔庵旁

丁田樹墓在茅嶺汪家冲

舊志有公冶長毛寶黃庭堅三墓按冶湖之名本因冶鑄而得公冶墓在曲阜載一統志無緣葬此毛寶雖曾爲晉熙太守而溺死在邾城今湖北黃岡縣亦恐不得葬此山谷卒於宜州歸葬寧州雙井祖塋之西見江西志自皖司李黃敬璣謂在懷寧尋於三橋阪紅鶴柴訪得其處封而祭之於是懷有山谷墓雍正中黃氏有據縣志與墓旁居民訟者賴郡守徐士

林駁斥其誤始息嘉慶中公冶墓亦有訟案賴學使  
徐頌援一統志正之考古不精影響附會無以信今  
而傳後反以啟釁而貽殃可不慎哉